



Las scholaras e'ls scolars da la Scoula La Plaiv vi da fer la cuorsa da posts sper l'En traunter Madulain e Zuoz. Quella cuorsa declera in möd interactiv e cun ingiuvineras il nouv purtret directiv.

FOTO MARTIN CAMICHEL

Ovelins chi s’uneschen ad ün flüm

In gövgia ho la Scoula La Plaiv – dimena il s-chelin ot pels scolars da La Punt fin Cinuos-chel – inauguro in ün ram festiv sieu nouv purtret directiv da scoula. Quel es gnieu elavuro düraunt ils ultims duos ans da la magistraglia, cun sustegn dals scolars e’l cussagl da scoula. Il purtret directiv dess servir scu muossavia per üna buna convivenza i’l minchadi scolastic.

MARTIN CAMICHEL/FMR

«Nus vaivans già pü lönch l’ideja da metter ad ir ün purtret directiv per nossa scoula. Fand retscherchas vains vis cha tels purtrets directivs sun pelpü ün documaint cun bgeras paginas e text. Per nus nun es que però gnieu in dumanda», disch *Julia Christandl*. Ella es mnedra da scoula da la Scoula La Plaiv daspö l’an scolastic 2021/2022 ed agiundscha cha que d’eira important da svilupper qualchosa cuort, pregnant e sainza flosclas. Il grand böt d’eira eir da visualiser il purtret directiv in ün möd grafic, simpel ed incegiantaivel.

Uschè ho la squedra da 12 magistras e magisters cumanzo avaunt var duos ans cun scolaziuns in quist connex ed es eir gnida accompagneda düraunt quel process da *David Halser* da la Scoul’Ota da pedagogia a Cuira. Cun sustegn da las scholaras, da scolars e dal cussagl da scoula es alura uschè naschieu ün muossavia per la Scoula la Plaiv – apunta il purtret directiv cul nom «unir – crescer – fluir».

L’ova scu fil cotschen

Punct centrel dal nouv purtret directiv es l’ova. Il fil cotschen sülla visualisaziun grafica sun l’En e tuot sieus flüms laterels traunter La Punt Chamues-ch e Cinuos-chel. Dimena as tratta que d’ün survista da las vschinaunchas e fracziuns chi faun part da la Scoula da la Plaiv e da las ovas in vicinanza. «L’En chi passa tres l’Engiadina collia eir tuot quists lös ed el ramassa l’ova da divers ovelins ed ovelets chi’d haun tuot üna eгна via fin ch’els rivan insembel in l’En», declera Julia Christandl. E la mnedra da scoula agiundscha: «Precis scu l’En dess eir nosa scoula esser ün lö inua cha tuots vegnan insembel – be listess d’inuonder cha vegnan», declera Julia Christandl.

Uschè sto alura minchün da quists 12 flüms laterels sülla visualisaziun dal purtret directiv per ün punct important dal muossavia da scoula, ün punct accompagnà dad ün verb. Quists verbs – chi’d haun eir tuots da chefer cun l’ova e chi vegnan declaros cun üna frasa – simboliseschan las visiuns e’ls böts da la Scoula La Plaiv. Uschè as chatta que traunter oter ils verbs CRESCHER («nus sustgnains ed accompagnains il svilup individual»), SCLARIR («nus ans tadlains tiers vicaivelsmaing e promovains il dialog e comunicchains aviert») u RINFRAS-CHER («nus dumandains e promovains creativited e vains il curaschi per novas ideas»).



Las scholaras düraunt l’inauguraziun cun svöder l’ova da lur vschinauncha in l’aquari.

FOTO MAD

«Nus vains scu team discus sur uras mincha pled e mincha frasa.»

Julia Christandl, mnedra da scoula

Ün’inauguraziun zieva duos ans lavur

«Per me d’eira que fich important cha nus ans pigliains avuonda temp per quist proget. Nus vains scu team discus sur uras mincha pled e mincha frasa. Que d’eira ün lung e bun process, impustüt pel svilup da la squedra da magistraglia», disch Julia Christandl.

Zieva duos ans es quist purtret directiv alura gnieu inauguro in gövgia saira e que in ün ram festiv cun preschantaziun, musica ed aperitiv. Perque ho alura eir minchün da las 41 scholaras e scolars implieu a chesa üna butiglia cun l’ova da sia vschinauncha, ed ho alura svödo

quell’ova in ün aquari per simboliser la cumünanza da scoula. L’intera visualisaziun dal nouv purtret directiv es gnieu installö süin quatter grandas tevlas d’aluminium güsta sper l’entreda da la scoula, uschè cha quel resta adüna preschaint scu visiun i’l minchadi.

Üna cuorsa per declarer

In connex cul nouv purtret directiv es eir gnieu installö sülla via d’ir a spass dasper l’En traunter Madulain e Zuoz ün gir cun 12 posts, inua cha que’s po cun ün’applicaziun e cun ün QR-code gnir a savair dapü davart il muossavia da la Scoula La Plaiv e que in möd interactiv e cun ingiuvineras.

Zieva duos mais sper l’En fo quista cuorsa da posts alura auncha müdeda sper la via traunter Chapella e Susauna. Cün quista spüerta voul la Scoula La Plaiv eir render visibel e declarer il nouv muossavia a tuot la glieud interesseda chi nun ho gieu temp da gnir a l’inauguraziun da gövgia passeda.

«Que’s drouva ün purtret directiv per gnir d’accord scu cumünanza da scoula e per musser in che direcziun cha nus ans vulains svilupper – e que eir sper tuot la materia da scoula. Perque es que eir important cha quist purtret as possa svilupper inavaunt e gnir optimo», disch Julia Christandl.

SAN MUREZZAN

Renover il vegl Kulm

L’hotel da tschinch stailas Kulm a San Murezzan investe-scha ils prossems ans 125 milliuns francs in renovaziuns. Il proget da fabrica maina il büro d’architectura dal cuntschaint Lord Norman Foster.

RTR/SDA/FMR

Ch’as vögla «collier la substanza istorica da l’hotel cun architectura ed innovaziun moderna», ho scrit il Grand Hotel Kulm quist venderdi passo in üna comunicaziun a las medias. E perque vegnan düraunt ils prossems ses fin set ans modernisos e transformos ils sectuors publics i’l plaun terrain da la chesa da tradiziun.



Quista vista süil Lej da San Murezzan – cha’l directur Heinz Hunkeler muossa cun plaschair – vessan ils giasts da l’Hotel Kulm da pudair giodair grazcha ad in annex scu restaurant in fuorma d’üna terrassa serreda.

FOTOS RTR

125 milliuns our da l’egna buorsa

La sanaziun da l’hotel da bod 170 ans vain realiseda suot la bachetta da l’architect da renom mundiel *Lord Norman Foster* e cuosta previsibelmaing arduond 125 milliuns francs. Las investiziuns vulesse la gestiun da l’Hotel Kulm contribuir svesse – dimena sainza sustegn da la famiglia possessura *Niarchos*. Invers RTR ho il directur da l’hotel, *Heinz Hunkeler*, dit in vista a la renovaziun: «La finamira es da preparar il Grand Hotel per las prosimas generaziuns, sainza perder sias rischs.»

Tar las innovaziuns architectonicas tuochan ün nouv areal per l’arriv ed ün restaurant cun terrassa serreda in fuorma da cuplas da vaider e cun vista süil Lej da San Murezzan. Ultra da que vess la garascha existenta da gnir ingrandida.

Butias e parcadis

Per der dapü vita a la Via Maistra da San Murezzan prevezza il plan da master da l’Hotel Kulm eir üna galleria cun butias per lung da la via sur l’hotel. Tenor Heinz Hunkeler nu vess que però da der auncha dapü spazi per ulteriuras butias da marcas luxurias. Ils parkegis chi sun actualmaing a l’ur da la via gnian rimplassos tres plazzas publicas illa garascha sutterrauna, ho dit il directur d’hotel invers RTR ed explichò: «Las prümas lavuors haun gia cumanzo il mais passo.»

Las lavuors principelas vessan impustüt da cumanner principi dal 2026, zieva las proceduras da permiss. Las dumandas da fabrica vulesse l’hotel inoltrer il cumanzamaint da meg. In tuot as fo que quint cun ün temp da realisaziun da quatter ans.

Üna chesa da tradiziun

L’Hotel Kulm es üna chesa turistica da granda tradiziun. El es sto l’an 1856 il prüm hotel a San Murezzan chi ho aviert sias portas. Ed in sia müraglia d’eira eir gnida impizzeda la prüma glüsch electrica in Svizra. Intaunt es l’hotel da tschinch stailas in possess da la famiglia greca Niarchos. L’hotel da luxus spordscha hoz allogi per totelmaing 300 giasts.

OSPIDEL ENGIADIN’OTA

Segl vulesse la fusien

La radunanza cumünela da Segl ho dit in in gövgia passeda cle-ramaing SCHI a la fusien da l’Ospidel Engiadin’Ota cun l’Ospidel chantunel dal Grischun. La decisiun es gnida tratta cun 44 vuschs SCHI cunter 13 NA.

Ad es uschè sto il quart SCHI a la fusien, zieva las approvaziuns da San Murezzan, Bever e Schlärigna. Las radunanzas cumünelas da La Punt Chamues-ch e Silvaplana haun però dit NA a la fusien düraunt las ultimas eivnas. Prosmamaing, per part zieva las vacanzas da prümvaira, haun auncha da decider las vschinaunchas da Madulain, Zuoz, S-chanf, Puntraschigna e Samedan – las ultimas trais faun la votumaziun a l’urna.

Impü ho la radunanza da Segl eir approvo in gövgia üna contribuziun annuela d’infrastructura e d’administraziun per la Fundaziun dal provedimaint da sandet Engadin’Ota. Quella contribuziun importa 1,6 milliuns pels ans 2026 fin 2030. Las cunvegns da prestaziun pel post da cussagliaziun ill’eted e per la Spitex sun eir gnidas prolungedas fin la fin dal 2027. (rtr/fmr)